

Kua Misa ta Eun Bèrdadero?

Kada biaha ku un otro sekta ta invadí nos komunidad chikitu bo por tende e pregunta. Kada biaha un grupito ta kibra ku un religion konosí riba nos isla i ta funda un otro iglesia, di nobo e pregunta ta lamta.

Tin hende ku ta sinseramente konfundí ku e tantísimo gruponan religioso. Kada religion ta pretendé di ta esun genuino. Kua misa anto ta esun berdadero?

Algun hende ta di opinion ku e pregunta aki ta irelevante. “Mi ta skucha tur ku ta bin na mi porta di mi kas” nan ta bisa. Segun nan tur religion ta adorá e mésun Dios; pues tur religion ta guia na Dios i finalmente i tur hende lo yega shelu. Pero e rasonamentu ei no ta lógiko. Si mi ke bai Caracas, mi no por borda kualke avion na aeropuerto bisando “tur avion ta bai Caracas.” Maske kon sigur mi por ta ku mi ta destiná pa Caracas ora mi borda avion pa Miami, mi ta kiboká. Ta mas kla ku di dia ku tur religion no por ta esun bèrdat. Ta hopi importante ku bo ta skohe e kaminda korekto. Bo destino eterno ta dependé di e desishon ei.

Otro hende ta evitá e pregunta i ta pone steker pa avisá otro religion pa no molestiá nan ku nan siñansa.

Kua religion ta esun berdato? Ningun religion, ningun klero por duna un mihó kontesta ku Beibel. Pesei laga nos wak kiko Palabra di Dios ta bisa.

E misa ku ta bèrdato sigur lo aseptá Beibel komo e úniko Palabra di Dios. “Tur Skritura ta duná pa inspirashon di Dios” (2 Timoteo 3:16). Hopi iglesia ta aseptá Tèstament Bieu i Tèstament Nobo, pero nan ta insistí pa agregá nan propio siñansa aserka esun di Beibel. Bo por sa sigur ku e religion ei no por ta esun bèrdato. Na final di Beibel tin un maldishon pa esnan ku ta “...pone algu riba e kosnan..ku ta skirbí den e buki aki” i tambe riba esnan ku ta “...kita algu fo’i e palabra dje buki dje profesia aki” (Revelashon 22:18-19). Kuidou! No tur hende ku ta kana ku Beibel ta prediká e bèrdato! Jim Jones, David Koresh i asta Satanas sa usa Beibel tambe!

Un otro evidensia klave kua religion ta bèrdato ta loke nan ta kere tokante Kristo. Tin hopi opinion tokante Hesus: E tabata un bon siñadó, E ta un angel. E ta un dios den miles di dios, èts. Ma atrobe opinion no ta konta. Kiko Beibel ta bisa? Skritura no ta laga duda ku Hesus ta Dios. “Ma dje Yu E (Dios Tata) ta bisa: ‘Bo trono, O Dios, lo eksistí pa tur eternidat’” (Hebreonan 1:8). Un iglesia ku ta hasi Hesus ménos ku Dios, no por ta bíbliko.

Ta importante pa evaluá kiko e iglesia ta kere tokante salbashon. Hopi religion ta nenga ku fièrnu ta eksistí. Mi tambe KE nenga esei, pero mi no por pasobra Beibel ta siña ku tin un lugá bèrdato di sufrimentu eterno i konsiente unda hende lo sufri pa nan piká (Revelashon 14:9-11; 21:8).

Hopi religion ta siña ku si bo hasi basta bon obra, òf sigui sierto rito, òf warda sierto regla, lo bo por skapa di Dios Su kastigu pa bo pikánan. Ma Beibel ta bisa ku nada ku nos ta hasi por salba nos. “El a salba nos no pa kousa dje obranan di hustisia ku nos a hasi, ma pa Su misericòrdia...” (Tito 3:5). Salbashon ta un regalo ku Dios ta ofresé...no un derechu ku bo por meresé.

Kon bo por haña e regalo? Dios ta stimábo i no ke pa bo sufri kastigu pa tur etèrnidat. Pesei El a kastigá Hesus na bo lugá. Si bo ta rekonosé ku asta ku bo obranan i religiosidat bo ta pèrdi i bo ta konfia Hesu-Kristo so pa salvá bo, lo bo ta salvá. Hesus a bisa enfátikamente “Ami ta e kaminda...ningun ta bini serka e Tata sino pa medio di Mi” (Juan 14:6). Un iglesia ku ta insistí ku hende por hasi algu pa ta salvá ta kontradisí Skritura santu.

Ademas chèk e iglesia su stèndertnan moral? Un religion ku no ta promové moralidat òf ku no ta preokupá pa esaki, basta ku su miembronan ta asistí na iglesia, no ta siña e berdato. Dios ke pa nos hiba bidanan santu (1 Pedro 1:15)

Kua misa ta esun bèrdadero? Nos a duna algun guia pa yudábo evaluá pa bo mes. Pidi un kopia di e kredo i reglanan di e religion. Paga bon tino na kiko nan ta siña i kiko nan NO ta bisa...pasobra algun ta skonde sierto kreensia pa bo te ora ku nan a garábo. Wak bon si nan ta trose Skritura na nan manera. **Nunka aseptá nan siñansa sin hasi un investigashon profundo si loke nan ta bisa ta kuadra ku Beibel**, pasobra Beibel ta determiná kua religion ta esun berdadero.